

Xroon yóxin ikjin ch'ín Pablo chr'énhen ch'án tí sín tinkáchónki Cristo chjasin Tsalónica

Ch'ín Pablo nixjehe ch'án tí sín Tsalónica

¹ Janhan Pablo la ko ch'in Silvano la ko ch'ín Timoteo ikjinni tí xroon i chr'anhánrá kichó ni ninko chjasin Tsalónica kixin jnkokoá tinkáchónkini It'eni Dios la ko Ìnchéni Jesucristo.

² Kjuasáyé It'eni Dios la ko Ìnchéni Jesucristo chrókjuintayaonrá ch'án kixin kjuaxróxin chrók'uejorá.

Dios sinchekitqexín ch'án tí tjié chojni tió tsokjan Ìnchéni Cristo

³ Kichóni chrókjuancheheni Dios kjuasáya jnkochrín kixin tí jahará. Na mé jína xikaha chrókjuich'eni kixin tinkák'ánkí tí tinkachónkirá Ìnchéni Jesús la ko tinkák'ánkí tí tjuèhérá kichuárá tjejorá ntiha. ⁴ Ntá chéheni chenkaní tí sín kichó ni kaín tí ninkoe Dios kixin naxa tjákoxinrá kixin naxa tinkachónkirá Ìnchéni kjónté síin chojni nínkakonhanrá la ko kjónté t'atsínkará itsjé kjuaxróxinha. ⁵ Tíha mé tjákoxinrá kixin tjinkaon Dios tsotsjehe ch'án kixin á tsjachará ts'ikonrá tí kjuachaxin kuènte ch'án. Méxra xikaha tjejotjasótexínrá jie.

6 Méxra ó nchoxon kixin sinchekjasóte Dios tí sín tjejonchekjasótiará jie. 7 Ntá tsjanjon ch'án kjuachaxin kixin ts'ok'áhará kixin ó kjuasótiará la ko kjaxin jeheni ts'ok'éheni tí yaon itsi Ìnchéni Jesús ts'inkajinxin ch'án nkaya nkajní tsikao ch'án kaín tí sín ángel t'etōan kuènte ch'án na mé tsikao ch'án xrohi nene. 8 Mé xikaha itsi ch'án kixin sinchekjasóte ch'án tí sín kuítekakuenhya Dios la ko kuítekakonhya tí tan jína kuènte Ìnchéni Jesucristo chrókuaáxin sín. 9 A ntá tí sín kuítekakonhya mé tsjasóte sín jnkochrín ts'ítuenhen sín ts'axrjenta sín tí kohya Ìnchéni, í ts'ikonhya sín tí kjuachaxin t'etōanxín ch'án. 10 Xikaha tsonhen tí yaon itsi Ìnchéni tsjikosáyehe ch'án kaín xín tí sín kjuínchetjóá ch'án la ko kaín tí sín kuinkáchónki sín ch'án la ts'ikon sín tí kjuachaxin jié kuènte ch'án. Mé xikaha kjaxinrá jahará kixin ó kuítekáonrá tí nkehe kjuakoharáni.

11 Mé xikaha jnkochrín tjancheheni Dios kixin jína chrók'uejorá éxí tjinkaon ch'án chrók'uéjó tí sín kjueyá ch'án, la ko tjancheheni Dios kixin chrótjáhará ch'án kjuachaxin kuènte ch'án kixin chrókjuinkitsará ch'án kixin chrókjuachará ch'erá kaín tí xra jína tjinkáonrá chrókjuich'erá kixin tinkachónkirá ch'án. 12 Mé xikaha kaín xínrá tsjikosáyehérá tí ihnié Ìnchéni Jesucristo la ko jehe ch'án mé kjaxin tsjikosáyahará ch'án kixin tinkachónkirá ch'án. Mé xikaha kjuasáyé Dios la ko Ìnchéni Jesucristo kixin kujikonóheni ch'án.

Tsonoxín ijnko ch'ín jínahya

¹ Kíchóni, a ntá tí tsi Ìnchéni Jesucristo la ko tsojnkotséni tí tjen ch'án jehe ch'án, méxra xíkaha chrónóaharáni ² kixin chrókjuítóxinhyará tjoka tí nkehe chrókjuenkayáxinrá, la ko ní chróchrakonhyará tí chróntáchro jnkojín nkexro tónohe sín kixin ó kjuixraká tí yaon itsi Ìnchéni, la ko chróchrakonhyará xíkaha chrókuínhínrá chróchronka ijnko chojni tjako, la ko chróchrakonhyará tí tsochronka sín kixin ó k'uáyéhe sín ijnko xroon éxí jeheni tsíkjanjonni chrónka kixin xíkaha tsonhen. ³ Títóéhyará kixin jnkojín nkexro chrókjuít'ayahará xíkaha. Naxa tsihya tí yaon ntá senó itsjé chojni tsonínkakohen sín Dios, la ko tsonoxín ijnko ch'ín jínahya chóna jie, na ntá tíha mé tsjasóte jnkochrín. ⁴ Tsjak'e ch'án tsjanjonko ch'án kaín xín nkehe tinkáchónki chojni, mé tsjak'etjaxín ch'án nkaxenhen tí nínkoe Dios kixin jehe ch'án mé sich'éna asén ch'án éxí Dios tí jehe ch'án.

⁵ ¿Á xráxinkákonhyará kixin xíkaha k'uéxrjanka senó tí naxa k'uéjóni jnkokoá? ⁶ Ntá jahará ó nohará nkehe tí kjuachaxin naxa chónthehe kixin naxa tjexrakáhya tí yaon tsonoxín tí ch'ín jínahya. ⁷ Ntá jie imó ch'e xra tí kjuachaxin jínahya. Kjónté naxa t'itjáyan kixin sáchrókjuí tí nkexro chónthehe. ⁸ A ntá tí ch'ín jínahya tsonoxín ch'án. Ntá tíó tsi Ìnchéni Jesús ntá tí itén ch'án ts'axrjexín ir'va ch'án ó mé ts'enxín tí jínahya a kixin mé xíkaha sinchek'itjáyanxín ch'án tí jínahya tí kjuachaxin jie tsikao ch'án. ⁹ Méxra tí ch'ín jínahya mé tsikao ch'án tí kjuachaxin kuènte ch'ín

Tsochren la mé xikaha tsochón_ta ch'án kjuachaxin jié tsjakoxin ch'án sich'iyaxin ch'án tsjasin ch'án kjuaxroan ntoáhya. ¹⁰ Mé xikaha kaín nkehe jínahya sich'iyexin ch'án tí sín xráxin ts'itjayan sín kixin chrohya sín chrókuitekaon sín tí tan chaxin ntoá chrókuaáxin sín. ¹¹ Méxra tsítóhe Dios tí jehe sín kixin tsitekaon sín kaín nkehe chaxínhya ¹² kixin ntá tsjasóte kaín tí sín kuitekakonhya sín tí tan chaxin chrókuaáxin sín na mé antsí kóxrjínhin sín chrókjuasín sin jié tsjasótexin sín.

Dios mé kjueyá tí jehe sín kixin chrókuaá sín

¹³ Ntá jeheni chrókjuancheheni Dios kjuasáya jnkochrín kixin jahará kichó ni chojni tjuahará Ìnchéni kixin tí tsíkjeýá Dios tí jahará kixin senó chrókuaáxinrá tí Nchakuen ch'án tsotjuáxinrá la ko tí itén ch'án chaxin ntoá kuitekáonrá. ¹⁴ Méxra xikaha k'uíyáhará Dios kixin chrókuaáxinrá tí itén ch'án tjakoni kixin ntá tsjachará ts'ikonrá tí kjuachaxin jié kuènte Ìnchéni Jesucristo.

¹⁵ Mé xikaha kichó ni, jína chrók'uejorá chrók'uitjayanhyará tí nkehe kjuakoharáni tió k'uéjóni jnkokoá la ko tí nkehe chrónka tí xroon ikjinni k'uayéherá. ¹⁶ Ntá Ìnchéni Jesucristo la ko It'éni Dios na mé tí nkexro kjuasáyé ch'án tjuèhe ch'án tí jeheni la ko nchechéhe ch'án asénni jnkochrín la ko kjuasáyé ch'án tjejóchónhenni itsi Ìnchéni ¹⁷ na mé sinchechéhe ch'án asánrá la ko tsjanjon ch'án kjuachaxin kixin ntoá chrók'uejorá ntá jína chrónixjará la ko kaín xra jína chrókjuich'erá.

3

Nixjehérá Dios kixin tsjinkĩtsa kaín ni

¹ Méxra kjuixixín chrónóaharáni kichó ni kixin chrókjuancheherá Dios kixin chrókjuinkĩtsa ch'án tí jeheni kixin tjoka sáchrókjuikjakoni itén Ìnchéni nkuixín kixin ntá tsinhin chojni la tsjikosáyehe sín ch'án éxí yóhe kuítekáonrá jahará. ² Kjaxin nixjehérá Dios kixin chrókjuinkĩtsani ch'án kixin kohya nkehe chrókónhenni tí siín chojni jínahya nínkakonhenni kixin kénhya sín tinkáchónki Ìnchéni. ³ Ntá Ìnchéni mé chaxín jína ch'án la jehe ch'án tsítóehya ch'án tí jahará naxa tsjinkĩtsará ch'án kixin jína ts'ejorá la ts'ayakonhanrá ch'án kixin kohya nkehe jínahya tsonhanrá. ⁴ Ó noheni kixin Ìnchéni la tsjinkĩtsa ch'án tí jahará kixin naxa sich'erá xra éxí k'uetuanhanráni. ⁵ Ìnchéni tsjinkĩtsará ch'án tsonohará kixin Dios la tjuahará ch'án la ko tsjinkĩtsará ch'án kixin chrókóninkákonhyará éxí kónínkakonyha Cristo.

T'ichjánxin chrókjuich'eni xra

⁶ Kichóni t'etoanxínni tí kjuachaxin ihnié Ìnchéni Jesucristo kixin chrók'uaxrjekjanxínrá tí sín kichó ni tjinkakonhyaha sich'e xra la ko xrihya sín éxí kjuakoharáni. ⁷ Ó nohará kixin nkexrí chrók'uejorá chrókjuákoxínrá éxí k'uéjé tí jeheni kixin tí k'uéjékoaráni la jehya kixin kjuích'ehyani xra. ⁸ Jehya kixin kjóneni niqtjé jnkójín nkexro ntá chrókjuenkahyani. Náhí. Kóxakonhenni nchakotjin la ko tie kjuích'eni xra kixin ninkehó chóntiāxinhyani tí jahará kixin chrókjuánjonrá tí nkehe chrókjóneni. Náhí.

⁹ Kjónté chóntani kjuachaxin chrókjuanchaharáni kixin chrókjuínkítasará tí jeheni kjánchó jeheni na kjuích'eni xrā kjuakoxinni kixin xikaha jahará chrókjuich'erá xrā. ¹⁰ Kixin tí naxā k'uejóni jnkokoá ntiha k'uetōanni kixin: Tí nkexro tjinkakonhya ch'e xrā la kjaxin chrókjonehya. ¹¹ Ó kuínhinni kixin tjejorá jnkojínrá ninkehó xrā ch'ehyará ā ntá kjuach'ia ó xríkoará. ¹² A ntá tí kjuachaxién Ìnchéni Jesucristo t'etōanxinni la ko chrónóexinni tí sín a kixin chrókóninkakonhya sín chrókjuich'e sín xrā kixin chrókjuacha sín chichaon chrók'uite tí nkehe chrókjone sín.

¹³ Ntá jahará kichó ni, chrókóxrjéhyará chrókjuich'erá tí nkehe jína. ¹⁴ A ntá tí tjen jnkojín nkexro titekakonhya tí nkehe t'etōanxinni tí xroon i la tsjehérá jína nkexro tíha la ntá chrók'uitohyará ch'án la ntá chrókósuèhe ch'án. ¹⁵ Kjánchó jehya kixin chrókjuánjonkoará ch'án. Náhi. Chrókjuínchexraxinkáonrá ch'án jnkojína éxí ijnko chojni kichó ni.

Ó kjuixixín nixja ch'ín Pablo

¹⁶ Ìnchéni mé tjanjon tí kjuaxróxin la ko naxā tsotjáhará ch'án kjuaxróxin jnkochríxín kjónté ichrén nkehe chrók'uatsínkará. Jehé ch'án mé t'ayakonhanrá ch'án kaín rá.

¹⁷ Janhan Pablo tjaná mé kjinxian tí nkehe nixjahará. Mé xikaha chrókjuátsoanxínrá tí letra kaín carta tsíkjian.

¹⁸ Ntá Ìnchéni Jesucristo mé kjuasáyé sintayaonrá ch'án kaín rá. Amén. Ó tjen.

**Tí Nuevo Testamento cuènte Inchéni
Jesucristo C'óna Nquìva
New Testament in Popoloca, San Juan Atzingo**

copyright © 1982 Wycliffe Bible Translators, Inc.

Language: Popoloca, San Juan Atzingo

Translation by: Wycliffe Bible Translators, Inc.

Popoloca, San Juan Atzingo [poe], Mexico

Copyright Information

© 1982, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Popoloca, San Juan Atzingo

© 1982, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 22 Feb 2024 from source files
dated 29 Jan 2022

b9b09122-b3f6-59f0-9594-749907b32b5b